



碗仔粿

恁久毋知起麼个癖？朝晨早跣床就想食碗仔粿！

還細歇在外阿婆屋下，每日臨天光就分舅姆喊跣床，去廳下唱核喏，再入灶下跣等佢共下做粿仔。舅姆做碗仔粿賣，搵手顧一家人个食著。天官光，灶下就係兩個人，事頭對一個細人仔來講有過辛苦兜仔，但係等舅姆做好粿仔，有兩碗碗仔粿做得食朝，論起來也係幸福个生活。

這下自家成家也，上班个人堵著放寮日，有日好睡輒常睡到日頭晒屎脰，等行到菜市仔愛來買碗仔粿，就淨看著空空个攤仔，全概賣淨淨伸半息都無。想愛食又早早跣毋得床，仰結煞就好？恁呀恁！就自家來學做正著。

決定自家動手學做就愛認真，對網路肚尋資料參考，問阿姆佢等有經驗个人。一步一步將買來个在來米粉加水攪好，倒入碗仔，再放在電鍋仔蒸。蒸粿仔个時節，做得來炒香料，等到香料炒好碗仔粿也差毋多蒸好也！

頭一擺蒸好个碗仔粿，頂項水水、底下硬硬。做得食，但係口感毋好。去請教阿姆佢等，得著个結果係在蒸碗仔粿該下，久久仔愛攪幾下米漿水，該米漿正毋會停腳，造成底下硬硬、頂項水水个情況。經過阿姆佢等提醒，再恁起還細看賣粿仔个舅姆蒸碗仔粿，佢正式會打開籠床蓋仔，再用筷仔同每一碗攪過正繼續蒸。該下還細，對蓋多事情都毋會去多恁，就無去了解做麼个舅姆會恁仔來蒸碗仔粿，這下了解事情个原因，做得學著一擺寶貴个經驗！

知得失敗个原因，佢就興撮撮仔再做一擺。這下知在哪個過程愛注意麼个，定定仔莫恁鬥緊个，該(goiˊ)愛攪過个米漿水就一碗一碗攪過，該愛蒸幾久个時間就蒸幾久，這兜過程半息都拖皮毋得。最掠尾蒸出來个碗仔粿食起來分阿姆佢等說得，這下正式成功也！下二擺愛食碗仔粿毋使再早早跣床去菜市仔赴人家个時間，又搭有好享受自家好食个美食也！

阿姆佢等看著佢學做碗仔粿，噓到喊毋敢，緊問做麼个愛恁麻煩？佢應佢等講，其實食等碗仔粿个時節，佢總係會恁起還細歇在阿婆屋下，每日臨天光該下，跣等舅姆在灶下做碗仔粿，等佢食過朝，佢搵蒸好个粿仔出去賣。該下年紀細，又無好跣在爺哀个身邊，但係還有人來惜。這下自家做得照顧自家，食等自家做个粿仔，恁起頭擺，這碗仔粿仰會恁香入心肚？

作者：陳志寧

☆詞彙學習☆

【碗仔粿】vonˊ eˊ banˊ：一種以碗盛入在來米漿蒸製而成的食品，北部稱為「水粿仔」。

【菜市仔】coi ciˊ eˊ：菜市場。

【水水】suiˊ suiˊ：水分過多的樣子。本文指如漿糊狀，無法凝固的狀態。

【停腳】tinˊ giogˊ：沉澱。

【籠床】lungˊ congˊ：蒸籠。

【興撮撮】him codˊ codˊ：興沖沖。

【半息】ban xidˊ：半點、一點點。

【拖皮】toˊ piˊ：耍賴、賴皮。

【最掠尾】zui liab miˊ：到最後。